

四庫全書

子部

欽定四庫全書

六藝之一錄卷三百九十

錢唐倪濤撰

歷朝書譜八十

明賢墨蹟

詩翰

李獻吉春日東莊帖

春日宴豫齊王孫之第

紫宮華宴敞春風  
密樹初花日映紅  
向暮酒闌香不斷  
始知春在綺羅中

迴廊曲樹稱春游酒綠花紅白玉甌借取游絲繫西日  
晚風吾上海棠樓

東庄送杭太卿兼呈其兄澤西年友

冬郊日白無風沙羣飲送客游瑯琊到時定生韋澗草  
有誰同醉歐亭花我今五十半潦倒君日高貴元才華  
至鄉為問澤西子老吟何處多煙霞嘉靖四年十一月  
也空同山人

夏桂洲五言絕句帖

行書

蕭蕭溪上竹湜湜溪中水何處訪幽人只在溪水裏  
曾涉清溪曲林深路轉迷幾時還載酒看竹到溪西  
桂洲夏言

楊用修石馬泉亭詩帖

九月廿六日始會于石馬泉亭二首

勝地荒蕪久華亭結構新清泉分馬頰白石動魚鱗玉  
瀉琴中韻花搖鏡裏春還將濯纓意擬問釣璜人

蒼靄環城下紅雲指海東登煩臨遠水搖蕙感回風歸

望微茫外生涯爛醉中故園千萬里秋色可能同升菴

楊慎

楊用修客途崇聖寺二詩帖

行草書

奉次九日客途韻一首

兩年九日客中行  
泛宅浮家水上萍  
鴻雁未傳滇海信  
茱萸偏動蜀山情  
空庭露白羣鴉散  
古木霜黃獨鶴驚  
樽酒相思搖落地  
江湖不隔夢歸程

崇聖寺

塵劫非人境煙霞是佛都山開銀色界海湧玉浮圖追  
蠡形猶壯伽藍跡已蕪經函飄粉蠹畫壁剥天吳零雨  
頽垣草驚飈廢井梧禪心同夜寂旅望對秋孤遠目窮  
千里狂歌倒百壺凭闌意無極感此歲云徂升菴楊慎  
稿上時川先生詞伯改教

陸儼山白雁詩卷

行書

比日邑中文士並賦白雁之詩雁介禽也天序而一節  
予感焉因有斯作一以寄東石一以寄鶴津

秋傳孤雁過瀟湘人在南樓望故鄉顏色總疑新變態  
羽毛錯認舊隨行關山雪後雲無影禾黍風前夜有霜  
贏得光輝照塵世久從靈沼近文王一首感始遇也  
粉煙和月下三湘呌斷天涯雲水鄉豈為蒼蠅衣盡化  
徒懷白壁夜分行北書不到勞清夢南地初寒帶蚤霜  
飛近巫山甘白首肯隨行雨賦襄王二首昔時好也  
澄波照影度衡湘迴雁峯高近帝鄉星陣望窮雲半沒  
雪翎風急字斜行萱花深處驚逢火木葉催時護曉霜

南去北來秋色裏大開三面憶先王 三首樂寬大也  
白雁是唐世相所蓄諸作祇雁耳再為之和用備斯義  
一為水姿歲浣湘不煩尺素寄江鄉愛鵝池畔聊同浴  
放鶴亭前不作行老去西風閒落日啼來午夜報清霜  
主人恩重終堪戀燕子猶知舊謝王 四首懷故主也  
哀怨何須更弔湘翻翻來自白雲鄉新籠鸚鵡堪同伴  
舊日鴛鴦不共行半畝水痕供睡月滿身涼意襯啼霜  
憑將縞素明心事不作禽荒有聖王 五首美聖德也



絕雲緣影墮清湘足有音書出異鄉可是歲深能變色  
祇緣形化遂離行階除印跡偏宜雪毛羽生寒本耐霜  
記得上林棲宿處却因形矢識君王 六首識榮遇也  
來從星漢下瀟湘妝點楓林入醉鄉錦字傳情通萬里  
銀箏移柱送斜行溶溶月色憐孤影渺渺歸心滯晚霜  
堪笑揚雄頭盡白重將羽獵責君王 七首悔末技也  
秋深池館拗江湘白雁馴來即故鄉留取碧波頻照影  
顰辭雲路舊排行風光正好連宵雨月色渾疑滿地霜

敢向劬勞怨憔悴且將詩句頌宣王  
八首頌中興也  
嘉靖丁亥九月之吉儼山人陸深子淵父試東坡藏  
研書于卅六峯之卷懷堂時年五十有一

陳繼儒跋一則見前

陸儼山夜燕詩帖

七月十六夜燕澄懷閣次韻答時望文學

滿天雲月遞虧明又送秋風過海城一上小樓無限好  
不須永夜十分晴江山自覺神為助竹樹真疑畫不成

況近松陵多倡和更於何處覓同聲  
四酉齋試筆儼山老人深拜稿

陸儼山望夫石樂府帖

行書

過車邳驛賦望夫石

望夫處近青天天高高山連連  
妾身化為石夫歸是何年  
夫不歸妾誰憐夫歸石能前  
夫有父與母高堂意雙懸  
妾不能前誰炊爨煙  
自唐人山頭風雨之作而此題目盛有詠製予亦嘗有擬作為補古樂府一篇要

止於義理焉乘楫子儼翁己丑八月三日

徐伯臣五言律詩帖

行楷書

善拳洞

玉洞踈仙宇丹光掩曙雲山連大澤氣石繡紫霞文東  
峽泉流細憑虛閣道分高人留內景遙貺洞庭君

張公洞

洞壑開層嶂懸巖俯碧流驚泉飛雪澗靈石起霞樓玉  
笈千年閱丹光五色浮昔聞招隱去今見結廬幽

秋日陽羨舟中

秋序生江甸，谿涼散午薰。  
艷將蓮采近，清有竹聲聞。  
出字重巖接，人文聯雁分。  
尋常辦水錯，鮮膾落波紋。  
長谷山人徐獻忠書嘉靖丁未之子月

彭隆池詩帖

卜築青溪館，新開弄水軒。  
宵連明月漾，曉愛落花旋。  
鶴引攜琴薦，鷗盤拂酒船。  
達人遵智養，豈復羨臨淵。

相近竹參差，相過人不知。  
幽花欹滿樹，曲水細通池。  
歸

客村非遠殘樽席更移看君多道氣從此數追隨  
右  
五言二律彭年

翻經累歲游禾郡攜錫重來住竹林貝葉如山留海藏  
雨花隨地聽潮音詩成苑外碧雲合定入禪心片月沈  
慚愧當時社中客醉多猶自費招尋 禾僧林竹堂懷  
詩過訪酬贈年

遠峯疑著雨高樹若含風水墨傳神妙楞仙繼石翁  
日斜疎樹影秋淨碧谿寒隔浦山千疊詩成馬上看

落日半山紫新霜疎樹紅詩人美秋興攜杖過橋東

右題畫三絕隆池

江南春色滿晴郊紫燕初飛未定巢最愛名園新柳外

一枝濃杏倚風梢 題杏

君家庭下有仙樹還疑天上遠移將素枝映月栽崑壁

幽韻因風散楚香 咏玉蘭

粉合胭脂作曉妝富於顏色各於香東風不肯全分付

相對梅花各斷腸 咏海棠

庾信風流賦小園碧山當戶綠池翻煮茶滌硯足幽事  
永日忘形與客言 彭年

徐子與

中行

送瑯琊王氏昆季詩草

海內於今有大名自耕黃糶隱茅衡論詩未必推公幹  
作賦還應過長卿萬里白雲知我癖十年青眼望君情  
故人西去多傾倒況復相逢愧此生

十年懷疏淚長枯兄弟伶俜滯海隅此度別離俱慷慨  
不知天地有崎嶇孤忠久抱千秋恨元惡方膺兩觀誅



正是聖明新雨露恩波應已決玄廬  
鳳洲兄弟赴闕  
上書賦此送之

聖主初綱法令齊萬方歡喜報金雞豈知禁効埋丹慤  
詎有恩慈漏紫泥北折闕清遠徼南驅日域靜遺黎

功多誰謂翻成譴汧督牙門死後題  
聞赦後再貽鳳  
洲兄弟獻忠

珊瑚網云向謠此枝山書竹懶翁見之曰此天目先  
生筆也遂改入此  
式古堂云向謠枝山改入子與

而詩歟係獻忠未詳

袁履善詠梅詩帖

行書

纔過幾朝渾拆徧只消一霎又吹空何曾學舞能迴雪  
便不為臺與避風

尺捶擬為千年用滿樹空留百口酸苦心乍可釐鹽裏  
粉骨那干鼎鼐間

自離京洛緇塵少一到齊梁綺語多老子七言雖澹泊  
何曾一字犯陰何

有花多處便凭欄  
插在金瓶日日看  
百斛量珠真富貴  
兩枝翦綠太寒酸

賦繁臺雪雲將暮  
歌罷庭花月未殘  
客至苑皆瓊作樹  
兵來井用玉為闌

起來無賴晚風狂  
便恐飄零損歲芳  
飛鷺不持身欲去  
綠裙雖墜魄猶香

江左風流屬謝家  
諸郎如玉女尤佳  
如何雪裏同聯句  
不比梅花比柳花

晚作園丁身荷鋤春風披拂到吾廬且須著意憐芳潔  
纔問和羹俗了渠

生長荒山野水傍何曾倚市及窺牆幽妍醜殺施朱女  
高耿賢如傅粉郎

漢魏裁詩韻已卑六朝人物更何為平生老子無蹊徑  
不識蟲兒并玉兒

浮休嘆柳斫為薪子美憐梅傍戰塵只愿玉關烽火息  
老身常作看花人

環子麗華今併去謫仙狎客兩堪悲懸知千載難湔洗  
留得沈香結綺詩

百卉凋零特凜然谷風栗烈澗冰堅陰山餐雪高臣節  
中野飛霜乞母憐

衰年鼻塞等薰蕕高摘濃薰各罷休奴斫長枝汲新水  
老夫胡用置香篝

看來靈種聚精英占斷人間一味清喚作花王應不忝  
當時虛廁水仙兄

嘔吐心肝撚斷髭籬邊沙際步移時  
捺奴竊笑翁迂濶  
敲斲殘詩廢午炊

錦囊玉笛喜追從  
度曲聯篇雪月中  
老對此君無意味

欠詩無笛少花翁

謂孫季蕃

袁履善曉仙謠帖

行草書

玉妃喚月歸海宮  
月色澹白涵春空  
銀河欲傳星靨靨  
碧浪疊山埋早紅  
宮花有露如新泪  
小苑叢叢入寒翠  
綺閣空傳唱漏聲  
網軒天降凌雲子  
迢遙珠帳連湘煙

鶴扇冰霜金骨仙碧天曲盡綵霞動下視九州俱悄然  
秦王女騎紅尾鳳半空回首晨雞弄霧蓋狂塵億兆家  
世人猶作牽情夢余老懷遊仙因擬曉仙謠一篇以  
山人醴泉沈高士不食煙火夜駐花寮晨興北瞻天馬  
雲氣靄靈若有所思而楊君達至欲乞寫為寫一通歲  
舍乙未嘉月既望余西峻陽居士素福徵

張澂書舊作詩帖

行書

舊作數首錄似春山老先生請教

次答濯川翁

荃井栽茶事已多方舟安可別煙蘿空虛也仰文章美  
汲引深慙禮數過山斗自今慙遠夢蒿萊回首足清歌  
重霄顏色吳中夜月白澄江路幾何

留鮑雲壁宿山中

江草江花幾夕醺燕山回首隔重雲功名遠赴鸛鴻列  
野性長追麋鹿羣此日竹樽還共倒清宵藜榻願平分  
松間細雨篝燈坐漫認昆吾劍上文



外以小作塵覽而先生不賜一字之教得非  
走弗能因往知來之故耶用是不揣復書一  
首少見懷私末二句以意逆之可也

翦燭高談憶舊年別來消息兩茫然通詩久負更風字  
曠飲無妨破俗緣八宦多君光郡國逃名我但足林泉  
元龍百尺江城裏何夕床分上下眠嘉靖乙未季春望  
前二日侍生張澂頓首拜稿

黃淳父詩冊

行草書

茲山信靈氣南望接蒼梧海近鑪峯暗天寒鏡水枯翠  
微空玉帛丹壑隱金符猶仰玄宮在千秋片石孤 右  
題禹陵

共遣區中累來從物外遊溪山勝不改吳越跡空留遠  
浦蘼葭晚陰崖薜荔秋寒花送歸棹漁唱起江鷗 右  
石湖秋泛

春煙嫋嫋雨濛濛梁苑隋隄一夢中纖葉空憐半江水  
殘絲猶怯五更風永豐園裏情無限蘇小門前曲未終

寄語飛花好，栖泊莫教飄蕩恨西東。  
長干柳

淺白深紅鬪合歡，絲絲香雨晝難乾。  
會須一日三百盞，無那春風十二闌。  
水上新傳錦字，豔樓頭長怨玉簫寒。  
可憐春色隨花盡，歸興還應帶月看。  
息園賞牡丹

蓬苑影纓羨年少，星裝千里赴神臯。  
王程草色催縱騎，仙闕花香待錦袍。  
侍從雍容恩最渥，文章清秘價偏高。  
金昌楊柳還堪折，綠酒紅亭揖佩刀。  
姚禹門還朝北

上

嶺南才子邁華風，早歲聲名動域中。  
無用官嫌廣文冷，合知詩有拾遺工。  
雙魚南北原非隔，老驥雄心亦自同。  
今夜思君淮海月，清光解到五湖東。  
答歐崙山郡博

豈因貧賤事干謁，閉戶著書無斗糧。  
猶恥王孫一飯惠，未忘俠烈五陵狂。  
黃金散盡留顏色，白髮悲來歌慨慷。  
相對秋風都市酒，青天不語泣干將。  
贈金孝廉子坤

空自時標千里駒，與君同哭阮生途。  
足離楚國方為玉，泣下鮫人始是珠。  
七首風霜羞烈士，馬蹄花月憶名都。

各天南北應難見頭白臨岐酒一壺  
右送廬山人次  
梗還濬縣

鷓鴣黃綠窻下芥羽含輕粉暖風階草長呼羣入花影

右題叔平畫

黃山南麓石湖東山色湖光蕩碧空  
十里橫塘芳草路  
菱歌清唱月明中  
姬水

豐南禺詠史并登瑞石山詩帖

行書烏絲闌紙

詠史二首

唐虞去我遠想像有遺書三苗贊敷德丹朱儆無虞如  
何誹謗戮坐見指鹿愚豈不懷蒼生策名舊天衢大厦  
非一支衡門聊可娛

殷宗墜妲己陳祀傾夏姬綠珠滅季倫碧玉戕知之造  
端察天地禽獸決幾希王道由慎獨長生捐美姬草廬  
志寧靜醜婦焉足嗤

### 登瑞石山

紫陽仙人今何在瑞石奇峯千古留積雪經年映紅葉

春雲滿郭縈朱樓日搖江影帆檣渺風起湖波簫鼓流  
笑索丁公玄鶴羽共君漫汗過瀛洲道生頓首上子和  
先生請正

陳白陽詩草

藩籬不設處吾道是吾家地僻寬行跡林深多落花興  
闌覺老至力倦畏途賒最愛茅簷月依依進復斜白陽  
山人道復

屋上春鳩鳴村邊杏花白持斧伐遠揚荷鋤觀泉脉新

燕識舊巢舊人看新歷臨觴忽不怡惆悵遠行客戊戌  
春日道復書

綠蘿百轉露華輕紫翠重重繞帝城天上神宮金作屋  
雲間仙樂玉為笙澗盤九渡三天淨峯疊羣星一劍橫  
此日分萸嗟鶴馭月明彷彿步虛聲九日登高和作  
自愧迂疎常取咎更兼多病懶經營一生落落真如寄  
舉世滔滔亦可驚身外事機爭入夢眼前杯酒却關情  
茅齋此夜勞相問風雨明朝未許行客過田舍奉贈



城上新月白溪邊新水深多因心跡倦不得往來吟

陳淳道復

陳白陽有鵲詩帖

行草書

有鵲巢南枝居然蔽風雨下上送好音成德流芳羽行  
者皆喜聞坐者亦喜觀何當鳥喙惡日來拆門戶門戶  
凋落時風雨乃旁午寄語同形人甚勿自相苦 近作  
書呈道濟老弟一笑大兄義齋留田舍累日不得同話  
言嘗有小詩不惜教和廿二日淳頓首

方岳醉歌

勸君且盡一杯酒身外無窮莫開口近聞誰直白玉堂  
或傳其佩黃金斗與君何干與我奚有不如雨話耕夫  
煙呼釣叟問竹活無看梅開否天下事自有夔龍人山  
中居只堪麋鹿友乾坤蕩蕩呼不聞今古茫茫骨俱朽  
雞催晨兔沒酉春風來時又花柳不知柳今幾青花幾  
紅但見吾人成老醜吾欲採薇西山播穀南畝吾牛雖  
健吾衰久只可茆柴火酒醉幾觴村田樂詩吟幾首不

然空山寂寂白晝長閒殺一雙無用手

馮咸甫微風詩帖

行書

微風庭院日閒閒問字人歸便掩關樓面四窗憑粉堞  
墻東一闕帶青山著成書繼先天後刪得詩從大雅還  
禪誦罷時臨古帖蕭疎竹影研屏間馮大受

陸子傳詩牋

人日立春前風光併作妍嶺雲鮮映日湖水澹生煙乳  
燕嬌花勝輕鷗送酒船韶華生樂事端不負諸賢為

明夫道太書師道

山迴水轉渚宮開  
霸主樓船避暑來  
六月湖中天鏡曉  
百花深處美人回  
鹿泉雉苑猶春色  
玉劍金鈿又劫灰  
惟有溪邊綠楊柳  
千絲還拂掌中杯  
消夏灣作

蒙山顧渚雨前春  
紗帽籠頭掩竹扃  
禪榻風飄詩欲就  
瓶笙聲轉酒初醒  
何人可獻驚雷英  
有客曾為品水經  
待汝山園生紫笋  
還期千里汲中泠

春光滿地百花枝  
烏帽承塵半醉時  
莫放玉鞭催馬急

瓊林還記宴歸時

坐占溪亭松樹陰  
紅塵不染靜中心  
高山流水千年調  
此趣應知不在琴

霜葉垂垂落木秋  
江城細路逐山幽  
扁舟載渡者誰子  
溪上有人歌遠游

千山一白照人頭  
蓑笠生涯此釣舟  
不識江湖風雪裏  
豈能干得廟堂憂  
子傳陸師道書

錢功父詩帖

楷書烏絲  
闌花箋

金雞消息杳難期銅柱功名此一時南檄舊分陳日晃  
東夷新斬莫離支烹魚不信書無字逐獸應愁路有岐  
聞說樓船方出海短衣寧用怨歸遲 寄懷伯耳

鐘梵聲移夜向分林端月出尚氤氲中庭紫罽千人座  
下界銀濤萬頃雲刻意商歌湘竹管牽情花氣石榴裙  
如何此夕杯中酒不為傷秋也易醺 中秋虎邱

越壘吳臺彷彿存湖頭煙火衛家村山浮眉黛非無主  
谷剝篋簫尚有孫懸榜總嗤新署筆頽垣猶識舊題痕

相逢共是登樓客惆悵秋雲落日昏  
秋日同周懋修  
諸大登浮黛閣

金昌樓上偶逢君把臂匆匆一論文已驚座上霏珠玉  
忽見筆底開煙雲聞君悼亡有新賦淚眼曾枯山下墳  
即今吳中久不雨往往禾黍生秋蠶清風賴君曼聲起  
坐令寒士無憂矣  
次答吳翁升短歌

結綺成灰肉陣空裸遊寂寞野花紅枯桐不是昭華管  
曾入春心醉夢中  
無題  
錢允治具稿

徐文貞與白谷詩帖

行草書藍  
絲闌紙

孟春五日奉候白谷老先生辱留飲從辰至  
申感念今昔因成一詩錄呈博笑

尊酒凭軒竟日留  
白頭重續少時遊  
漫憐名附天閑驥  
且幸身陪谷水鷗  
膠漆有情原不解  
邱園無事足相求  
請歌伐木君徐聽  
一月應須一繫舟  
眷生徐階頓首拜

徐文貞五嶽詩帖

行草書

五嶽一首



五嶽分五方迴薄凌穹蒼遙從太極判秀色新如常中  
藏古僊人玉貌無凋傷日月掩靈洞雲霞封石床黃公  
有高標拔俗心飛揚恥隨家驚食思與煙鸞翔同天不  
相知投契在短章青鳥今日來報予渡江湘涉厯遍九  
州躋攀攬遐荒天游捫羣岫虹度窺石梁僕本餐霞人  
聞之悅肝腸但恐陰陽移人命如朝霜何不早辭家駕  
鴻鞭紫凰四嶽倘歸來嵩邱是五鄉若採三花樹行隨  
白鹿傍 山人有超世之志將棄儒業思遊五嶽邇得

覽予詩于程子逆旅喜予志同雖未晤平生而走書十  
里因露本懷以要一詩予緬欽高風灑翰遙贈焉存翁

王弇州書雜詩帖

行書

西山一何高高高殊無極上有兩仙童不飲亦不食與  
我一丸藥光耀有五色服藥四五日胸臆生羽翼輕舉  
生風雲倏忽行萬億流覽觀四海茫茫非所識

人生不滿百歲歲少歡娛意欲奮六翮排霧陵紫虛蟬  
蛻同松喬翻跡登鼎湖翱翔九天上騁轡遠行游東觀

扶桑曜西臨弱水流北極玄天渚南翔陟丹邱

九州不得步願得凌雲翔逍遙八紘外遊目歷遐荒披  
我丹霞衣襲我素霓裳華蓋紛掩藹六龍仰天驤曜靈  
未移景倏忽至昊蒼閭闔啓丹扉雙闕耀朱光徘徊文  
昌殿登陟太微堂上帝休西嚮羣后集東廂帶我瓊琚  
佩漱我沆瀣漿踟躕玩靈芝徙倚弄華芳王子奉仙藥  
羨門進奇方服食享遐齡延壽保無疆瑯琊王世貞

龔子勤遊牛首山詩帖

行草書  
灑金紙

為探塵外勝載酒恰初冬逕曲可百折山深知幾重晚  
煙迷百木寒月出高峯一望諸天近雲端起暮鐘  
覽勝興不極穿雲宿翠微捲簾明月入倚檻遠山圍佛  
偈風鈴語禪心霜葉飛灑然塵慮淨相對共忘機 遊  
牛首山二首毅所龔勉

莫雲卿詩蹟

小閣帶溪流山深事事幽應知草玄閣寂寞向滄洲  
羽客不可尋煙雲自來去時時神鶴飛誰辨丹成處

明月來何時花深露華冷酒醒去空階佳人弄花影  
曉霧散金液翠旗千葉開羽經堪自著客第品泉來  
為懷荆汪丈書於龍潭舟次是龍

十年裘馬熟長干飛夢隨君去不難桃葉渡頭歌舊葉  
木蘭舟上採芳蘭誰家明月酣春卧京兆梅花犯雪看  
愁絕倚樓嬌眼在粉啼容易傍人彈雲卿

乍出蘭盆倦晚妝輕綃不掩雪肌香新纏羅襪勾春興  
何用雙飛小鳳皇咏理紈美人

周幼海詩草

山盡雲邊路林窺湖上天身疑出宇宙目已極風煙幻  
迹虛舟外閒情短策前桃花春更好為憶避秦年

三月淹歸候孤帆待好風稽山望不及落日思何窮水  
濶煙光外天低樹影中江籬不能賦詩客旅愁同

扶病看山出同人載雨過寒生幽谷早暝入亂峯多孤  
塔搖層靄長橋拒遠波將寒湖口勝拚為借漁簑

巖際破雲栖高寒夢不迷數峯孤枕上片月大江西度

壑鐘聲小垂檐象緯低褰裳看未足何處報晨雞  
右  
舊作四首天球漫書

城上高臺半切雲平臨睥睨送斜曛西山曲抱神京紫  
北斗中懸帝座文晚色千門雙杵動空天萬里片鴻分  
黃金已改當年築綵筆何須太史聞

扶桑一派碧琉璃春水溶溶漫拍隄兩岸綠蕪飛白鳥  
半窻紅日唱黃鸝磯頭雨歇尋漁具柳外風吹行杖藜  
自愛塵纓歌濯處憑將詩酒樂幽棲

醉倚高臺雲幾重  
青山歷歷見江東  
天風忽向闌干度  
一片芙蓉落掌中  
牛首層巒

盧鴻石榻寄嵩山竹雪松雲共洒然  
我欲逃名巖石去  
無如此地隔風煙  
山居

小窗秋色滿庭階  
寂寞無營自煮茶  
賴有短牆芳草積  
不教蝴蝶過鄰家  
秋色

繡嶺春雲拂翠文  
綠軒春酒醉蘭芬  
不知門外塵埃滿  
惟挾山中鸞鶴羣  
周天球書



徐文長諸詩帖

行草書

廿載神交後尺書長跪辰涸魚幸不死閨月亦徒春碧  
柳深高館紅雲近侍臣相過不能數叔夜嬾方真書  
簞贈顧鴻臚

人多驄馬客君慳白雲司棘署了公事梅花作雪枝帶  
寬知懶在馬重覺塵隨頗憶洞庭否煙波十二時

豈無蘭蕙好獨結嶧陽桐訪友必囊去焚香足對儂風  
雷懸一壁山水伴千重一作梅花弄都令雪滿空任

琴篇為趙子賦號

阿嬌不含笑西子却宜顰臉濕雙啼月花滋二月春拭

綃歸翠袖溜粉到朱脣欲得千金倩

謂笑也

還渠桃葉津

賦得梨花一枝春帶雨乃是一麗人為所私留絆不得渡桃葉而啼座上並賦

角枕覆衾長新香異舊香昔年曾射雉此日復求凰玉  
靨當明鏡金陵數妙妝夫君莫早起初日未高梁  
妾詩

昭陽隊裏混鉛華垂老參師日未斜  
不向秋風怨團扇却教明月進琵琶  
朝留楚簾身為雨夜繡茅君線作霞  
笑殺緱山閒姊妹尚論恩寵舊誰家  
宮人入道

赤霞城畔女郎身曾將羅袖障紅塵  
半巖竹淚猶啼月一水菱花解照人  
那取藁砧還破鏡祇持完璧碎強秦  
胡天風雨來何急似覺詩成泣鬼神  
清風嶺

長春明月夜闌干起視當眉尺五間  
千里林光俱趨水

一杯江氣亦浮山

南望錢唐  
僅一拘

似聞隔岫吹長笛欲喚真

官語大還忽憶廣寒清冷甚有人孤珮響珊珊 宿長

春祠眺月百八仙臺

昨宵聞汝樂今日聽鶯喉何事朱脣裏能為白雪流迢迢涼夜永脉脉故鄉愁數付梅花落梁塵繞未休 朱

四

十年多患難此日一牽裾幸免清霜委難辭白髮俱半生三四見晚飯一雙魚復作匆匆別臨岐各黯如 訪王山人於吳門

一葉隨流去不還悲君號向大隄看阿翁風浪今如此  
少婦瑩篴枉自彈古栢隔祠江浩浩

謂曹娥祠也

愁雲塞岸

海漫漫昨宵醉裏披圖畫淚落風前共燭殘 陸孝子

詩

方山先生今七旬學道吟詩鄉里聞自脫青衫還舉子  
不栽黃橘比封君髮長七尺朝梳雪門對千峯暮掃雲  
既遠塵鬟如此相不愁鸞鶴不為羣 方封君七十其

子刑部郎索

住山中白髮長七尺

金在衡橙墩隱居行

隱居行為橙墩武翁壽頌 金鑒書

龐公隱鹿門魯連蹈東海從古稱達人高風振千載先生有官不自居清時恥曳王門裾先生有財不自蓄散與兒孫買書讀閒來一局棋興到三杯酒慷慨發長歌從容開笑口眼看佳世七十年家有園池野有田輕將意氣向人吐落得風流薄海傳我本逃名君避世自謂平生心膽契憶昔青春今白頭分明異姓如兄弟君家

作德昭蒼冥幾人福壽康而寧披圖致頌何所願但願  
南山相對長青青

邢子愿送高徵君詩

百粵牽鄉夢燕遊事事難鵲鵲經歲散風雨去途寒度  
嶺梅初發還家臘已殘故園魚稻美天末憶加餐送高  
徵君

邢子愿五日即事詩

避炎樓閣書長閒與爾開尊面遠山瓜本邵平浮素盞

巾猶郭泰折青綸天朝命相初宣制人世還山且駐顏  
湖海茫茫關底事視君腰缺有緹管來禽伺頓首具稿

何士抑送友南遊詩帖

行行送子將秋天秋風先到木蘭船酒酣慷慨時扣舷  
自言男兒當勉旃擬經方逾揚雄年枕戈誓著祖生鞭  
子有令名元無前致身直上雲霄邊公車奏牘常三千  
新詞奪得金花箋不枉雙書藜杖煙秦淮渡頭水勢便  
鳳凰臺上月華鮮此時得意如登仙正與公子同翩翩



送友人南遊之作為楚菴先生書何三畏

王百穀詩卷

萬里還家一草堂佩刀猶在問王祥  
心同玉女寒潭水鬢著銅官曉岫霜  
中聖且教田種秫長生須待海成桑  
春風倚杖柴門下無數南山近女牆

千里山川命駕行鷗冠魚服暫藏名  
詞人盡訝青雲待關尹遙瞻紫氣迎  
吳苑游絲三月絮蘇堤芳草六橋鶯  
還家載得詩盈篋莫道扁舟似葉輕  
廣長菴作二首

東山別墅半桑田夢草詩成憶惠連  
隔岸晚煙千嶂綠  
當樓明月一洲圓  
林中竹葉人人酒  
渡口芙蓉日日船  
此地不妨雲共卧  
戴逵誰送買山錢  
范仲昭別業  
虎山橋外水如煙  
雨暗湖昏不繫船  
此地人家無玉厯  
梅花開日是新年  
為愛荆先生書王穉登

龍鬚蔓引青油幕  
瑪瑙珠傾碧玉杯  
日午漢宮開暑殿  
佳人共嚼水晶寒  
右題蒲萄太原王穉登書

杜子紆望裏煙生詩帖

草書

望裏煙生是子家  
草堂應近鶴鴒沙  
江汀每恨無舟渡  
野店空憐有酒賒  
半雨暮成風外雪  
孤樓春動臘中花  
相思尚隔前村遠  
獨倚柴門數去鴉  
杜大綬書似之果  
世丈

俞養正效白居易知足吟

紛紛世人幾知足  
爭如野老無拘束  
忘機跣石聽琴鳴  
乘興閒行傍柳綠  
古書細閱雨三行  
社友相逢或五六  
有時對奕無雄心  
鎮日濡毫聊免俗  
乳鴉幾點爭樹喧

玄鶴一聲響空谷一輪明月掛松梢呼童拍塞傾醴醕  
清光映入酒杯中微酡漫唱遊仙曲紙帳梅花春復秋  
藥爐丹竈煙凝屋雞聲報曙夢回時披襟又起看朝旭  
麕衣淡飯隨分休不識是非榮與辱且效羲皇太古民  
繁華謝却還純朴

六藝之一錄卷三百九十

欽定四庫全書

六藝之一錄卷三百九十一

錢唐倪濤撰

歷朝書譜八十一

明賢墨蹟 詩翰

項墨林南園雜詠詩帖

南園雜詠

深林既杳靄修竹復繽紛濁酒可自適鳴琴誰與聞  
繚繞植疎竹間以百花重雖無雕繪飾聊用代垣墉

槁梧據混冥吾亦忘吾形停雲抱虛牖清吹來空庭  
晚涼風色和日落浮雲多鳥喧亂叢薄魚戲動新荷  
夏夜敞軒屏蕙茝有餘馨一雙巢幙燕數點照書螢  
遊心假翰墨晦迹托林垌品水思刪譜評茶擬續經  
種竹深林中竹生日以廣詎擬千戶封但資三逕賞  
蔭樾如垂幄巢林當結樓寄言麋鹿友卒歲爾同游  
時流好好少年士籍棄微寒白髮何由變塵冠不復彈  
萱草樹堂背合歡生階前冥心與物化憂憤自相捐

良木材先伐猗蘭芳見鋤芭蕉獨無心隨時自卷舒  
鳥聲百種囀蝶思杳然迷陰陰桃李樹其下自成蹊  
席門繁委巷几榻凝緇塵不見乘軒者還來存故人  
右凡十四首閒居寡歡風雨蕭然興言成章曾無詮次  
聊書之以遺知者耳少嶽山人淇三弟  
學圃理荒穢抱甕汲寒泉黽勉戒餘隙汎覽無生篇  
前失錄補之

項墨林送嚴少渠詩帖

草書



抗手彈冠易別離  
天長日遠未云疲  
路連燕薊平如砥  
水下清淮疾似馳  
寒雁幾羣衝塞起  
秋蓬十里信風吹  
知君亦是悲歌者  
慷慨行游及爾時  
嚴子少渠北游  
既發二日詩乃成  
豈情深不能言耶  
項元洪

項貞玄近作詩帖

行草書

夜圓淨無語  
上方鑒羣形  
浮雲滓碧空  
萬象忽冥冥  
風起浮雲去  
依然見太清  
人心洞無物  
情欲障明靈  
恬淡忘欣戚  
勝理自常惺

月下步虛辭

形從圓後減光自暗中生減減到光暗生生復圓形盈  
缺本禪代暝照係潛升一氣布萬象化機無停軫寂寂  
悟玄虛悠悠保性靈不須假羽翼輕舉跨青冥 近作  
二首項德純書上雲麓丈時年四十六也

項貞玄書折楊柳詩帖

草書

折楊柳詞

山高巫峽長垂柳復垂楊同心且同折故人懷故鄉山

似蓮花豔流如明月光寒夜猿聲澈游子淚沾裳

楊柳亂成絲攀折上春時葉密鳥飛礙風輕花落遲城  
高短簫發林空畫角悲曲中無別意併是為相思

娟娟河隄樹依依魏主營江陵有舊曲洛下作新聲妾  
對長楊苑君登高柳城春還應共見蕩子太無情

萬里音塵絕千條楊柳結不悟娼園華遙同故嶺雪春  
心自浩蕩春樹聊攀折共此依依情無奈年年別

萬里邊城地三陽楊柳節葉似鏡中看花如關外雪征

人遠鄉里娼婦高樓別不忍擲年華含情寄攀折  
倡樓啓曙扉園柳正依依鳥鳴知歲隔條變識春歸露  
葉凝啼臉風花亂舞衣攀折聊將寄軍中書信稀 貞  
玄道人項德純書述

項貞玄元旦詩帖

行書

過去雖云增將來漸以減炎涼恒摧新歲命不再返年  
壯恣輕肥老大徒悲感浮生多坎軻大道何曩坦青陽  
品景熙所遇欣仰俛玄寂保真虛化機同舒卷 戊戌

元旦作貞玄純

項良枋秋夜詩帖

行草書

秋夜同仲醇宿舷師房

黃花露未收聞雁五更頭此夜不聯榻一年虛度秋良枋

項良枋九日詩帖

行草

九日

九月九日雨花臺片片青山落酒杯青山萬古青不盡

曾見六朝歌舞來

莫道重陽無菊花與君爛醉各天涯白雲似解遊人意  
遮却東南不見家 項良枋具草請政

丁南羽詩帖

楷書烏絲  
闌紙本

巾車指日赴神京千戶歡歌載道行咸謂滎陽推異政  
豈徒脩武得能名貢賢不為耽高賞抱玉終非報主情  
首課論功稱內治一時帝里動清聲

萬方玉帛會幽燕報政無如茂宰賢燕饗承恩歌湛露

簿書上計謁甘泉王春欲動宮牆柳客夜聊揮單父絃  
何日刀環仍賜返三農置酒樂堯年 送祝明府入計

北上二首

極目憑陵思不禁重雲覆檻晝陰陰黃金久失燕臺色  
明月長懸國士心秋盡薊門霜樹遶寒生易水露華深  
應圖駿褭騰驤入誰向天閑嘆陸沈賦得黃金臺送祝  
明府北上

歲暮山寒冰雪深高軒千里託雲岑春回榛莽延佳色

臘破梅花伴苦吟，  
滌耳繁聲鳴急溜。  
侵簷薄藹散平林，  
無論寂寞耽玄草。  
時許侯芭載酒尋。  
冬暮攜尊過訪臧，  
國博晉叔山居丁雲鵬。

董文敏花開攜酒詩

大行書  
小挂幅

淺深紅白宜相間，  
先後仍須次第栽。  
我欲四時攜酒去，  
莫教一日不花開。  
其昌

松亭一篇

款書  
玄宰

炊煙連積靄，  
隱隱見松亭。  
亭中有靜者，  
單讀淨名經。  
其



昌

陳仲醇詩詞諸蹟

步步穿危磴幽蘿引蔓長竹深山瓦綠松老羽衣香珍  
果從猿摘清泉共鶴嘗石壚趺坐久松壑忽斜陽入  
山一首似愛荆先生陳繼儒

綠髮丹臺生結廬長松側仙客未通名對奕不相識雲  
來碁局暗雲去分黑白獨有雪髯猿旁觀無怖色 右

題仙奕圖

山上多松柏山下多花果松老已十年果熟垂百顆  
擘茶染異香鑽石傳新火寫經未終函已得前生我 右

寫經作

樹底息微躬才容靜者通終朝醉花露無價買松風  
採藥山中相註經河上公往來不一里鄰比竹谿東 右

避暑作

不惜杖頭錢買花栽滿路愛花如愛子一步一回顧  
花前攀折人酷於風雨妬勸君莫採花還作花都護 右

種花示客

大隱在城市仙人好樓居  
四五百竿竹二三千卷書  
竹可題名書可讀況有新松翠如沐  
就中上座是阿誰君與梅花兩尊宿  
宿陳繼儒似玉水詞兄正

我有好山長苦出少年羨汝獨安禪  
閉門刪草不辭倦對月讀經猶未眠  
藥竈夜留桑柘火茆堂秋淡荻蘆煙  
穿林有伴攜琴至聽到松風第幾絃  
眉公

仙女吹簫忽下樓問年十七尚含羞  
五銖錢串同心結

百和香勻半臂襟  
鏡裏見人驚  
却步夢中索母學梳頭  
起來笑點花簪戴  
多子先教采石榴  
友人五月納姬之作

春風久唐突花事亦支吾  
猶有蘼蕪路青來范蠡湖  
春風醺柳枝宿鳥棲不定  
笑踏斜陽中折花以相贈  
暮春遊橋李二絕書似愛荆先生陳繼儒

閒往閒來獨晤歌  
柳花燕子水微波  
西湖堤上平如砥  
春草青青放白騾  
憶西湖作

瀟瀟洒洒枝頭雨  
磊磊落落千章松  
曉坐竹窗無過客  
隔溪明月打山鐘  
迎秋早坐

寂寂山堂報晚鐘  
繞身三匝見獰龍  
戲將帶縛龍腰上  
明日尋來是老松  
右解脫偈

湯鄰初倣蔡蘇黃米燈夕詩四幅

瑤京五夜溢寒光  
散落清輝滿下方  
無限素娥親翦就  
半天霞錦半霓裳  
鄰初煥

先生碧海照天空  
萬井晴搖玉樹風  
誰捲石家紅錦帳

一時移入水晶宮 湯煥

水晶簾箔夜光珠  
隱映虹橋落九衢  
已見台階符泰運  
更看人壽比方壺  
鄰初道人

霓裳隊裏按歌聲  
散作人間鼓吹鳴  
坐聽西樓更漏盡  
不知東海曙光生  
堯文

珊瑚網跋一則見前

顧西坡歲旦詩帖

行草書

歲旦偶得一章錄寄世占秋元舊契一笑

滿堂簫鼓賀新年  
暖日晴雲萬里天  
毛髮已非三祝舊  
衣冠原似十年前  
杯行小閣無兼味  
詩咏東風有剩聯  
分付兒童休卜富  
亂堆經史是良田  
西坡顧楷稿辛巳

一日

甘雙泉門巷詩帖

行草書

門巷深深竹作籬  
睡高紅日共雲癡  
何因又走東南釣  
翦却凌空水月枝  
南海雙泉子甘學

段子辛地迴通波詩帖

地迴通波接林迴曲岸斜人逢牛渚詠興落剡溪槎藥  
潤泉澆圖花明雨映沙停舟一借問知是葛洪家廬山  
段金

沈俊民不律引詩帖

楷書

不律引

夜擒老兔蟾宮秋拔毛脫穎聲啾啾湘筠翦綠淚花愁  
天丁束縛風颼颼健如戈矛快心手粉壁長廊洞窻牖  
渴驥奔泉怒猊吼雨聲颯颯驚蛇走唐虞謨典開鴻濛



魯史筆削攘天功  
今人製作堪古用  
古人用意非今同  
不學黃金賣詞賦  
巧將哀怨回情素  
風雲月露雕蟲妬  
落花飛雪滄江暮  
神鋒奮發百斛杠  
力排山岳輕毫芒  
鬼母夜哭蛟螭藏  
管城奕奕垂清光  
吳興沈俊

滕晉生留別少石詩帖

草書

天涯傾蓋意如何  
落日津亭感慨多  
客自風塵辭大漠  
雁先霜霰度長河  
青楓樹杪懸帆影  
白雪尊前擊筑歌  
別後不愁芳信杳  
春風應許到煙蘿  
晉生滕季達

潘芝田送少石詩帖

草書

送少田汪先生南還

衛水溪頭問去舟，關河砧杵漢宮秋。  
西風短棹人千里，落日長亭酒滿甌。  
吳地煙花豪士樂，楚天風雨故人愁。  
臨岐怕上危樓望極目，湖山悵遠遊芝田。  
潘鑒書

郭菊軒寸善堂詩帖

人生具萬善，積之貴朝夕。不觀江河水，廣大由涓滴。  
不觀合抱木，養成自萌折。積善苟弗懈，由賢入聖域。  
郭鎮

陳誼寸善堂詩帖

纖善不可棄累之若層臺樹德本食報古人無此懷黔  
敖萬金產餓夫恥嗟來富弼在當路賑饑詎難裁羅君  
無厚祿衡門閔蓬萊研究岐黃書百氏從兼該卹窮閔  
孤寒重義多輕財抱疴往求治惕然方寸開月培復年  
植小木成翹材悠悠太湖水東逝無西回湖水有時涸  
慶門無替哉宛邱陳誼

鶴仙榴花詩帖

行楷書

咏榴花一首呈西峯先生是正

榴樹秋來更著花一枝紅豔倚屏斜  
不禁遲暮侵寒雨盡吐芳菲散夕霞  
醉後折來驚客鬢夢中歸去惜年華  
武陵桃樹漁郎識又負西風八月槎  
鶴仙仁頓首

倪鴻寶晴山詩

晴山點不上多煙一味幽清澹  
遠天最愛長松松下水秋光都在釣魚船  
題畫似玉斧老公祖元璐

曹能始花朝社集詩

倚仗芳春物外尋城隅渾似入山深百花放盡空生日  
亂石衝開即故林詩酒雖然娛蔗境水田猶未露秧針  
座中若有藥巴術喫墨偏宜戲作霖 癸未花朝社集  
有介詞丈濤園請正學仝

黃石齋簪筆披襟之印

草書  
綾本

簪筆不盡意披襟一喟然涓埃臣子裏彤璽古人邊要  
不慙燈火何須論俸錢長戈與白石往往謝流年

釋一初

守仁

螺山隱士歌

螺山有隱士飄然仙者徒朝游螺之巔莫息螺之隅紅  
塵拂落身外事白頭讀盡人間書不騎琴高鯉不釣任  
公魚手披演雅篇架列山海圖蛾司漫給五斗黛蛤浦  
豈羨雙明珠槐臺封侯笑螻蟻楚關脫網憐蜘蛛人言  
大隱隱朝市小隱螺山無不是何物老病香山翁隱作  
留官良可鄙酌螺之杯飲螺几坐對螺山淨如洗鈿屏  
矗矗鏡邊來佛髻我我望中起千林飛翠散晴空半島  
寒雲浸秋水我尋螺山居遂識螺山路一見螺山人再

誦螺山句紛紛草堂文悠悠遂初賦丈夫無遠謀千載  
何足慕我本逍遙人亦有罝網慮買山每寄沃洲書寥  
落江鄉歎遲暮江鄉寥落不可留便當卜爾山之幽安  
得神黿負山去共踏青螺海上遊

姚少師

釋道衍

詩翰

白雲生江海客廣陵不歸今十年雁書未到風塵隔落  
日淮南親舍違每望東道白雲白焦桐夜鼓天地愁銀  
雁紛紛隨瑤席瑤花夢落楚天寒萱草春深露華碧白

雲生爾孝不負親爾忠寧負國讀書只足記姓名學劍  
須當萬人敵白雲生勉爾力犯龍顏請恩澤縱不能取  
封破胡將軍萬里侯亦不失漢家良臣二千石胡為乎  
痛言不上賈生書辛苦尚馳毛義檄我亦天涯倦行役  
慈母上堂年半百為君重賦白雲篇激烈長歌轉悽惻  
右白雲生歌為王履道賦懶閣翁

牛衣卒隱者流一貧寧苦困田野挾策不肯干王侯十  
年從軍不得志歸來自飯溪邊牛牛衣為衾石為枕雷



鳴鼻息春鼯鼯醒來復夢夢復醒不知蝴蝶為莊周又  
安知魯遭郈鼎秦焚舟晉盟踐土齊葵邱戰國蘇秦何  
足道黃金用盡空貂裘漢家王章不解事妻兒對泣良  
可羞牛衣卒褶袴不掩脛破帽不戀頭生不逢堯與舜  
禪焉能處處增煩憂夜漫漫風颼颼東方苦未出長歌  
且卧南山秋 右牛衣卒為王景序賦道衍

姚少師五言詩帖

我本巖壑人不樂城市住從來禮法疎自得山林趣山

林有何好竊窕忘世慮素積洞口雲綠藹沙頭樹深林  
暮煙集長空孤鶩翥遠峯疑有無飛瀑如雨澍其中隱  
者居茂密堪旅寓安得天隨子遊從隨杖屨逃虛

邢夫人

慈靜

自述詩帖

行書烏絲  
闌紙本

儂自閨房處女子聞君博覽通古史歸君薄海宦游多  
光陰幾度如彈指萬里黔方曲路長松栢森森雲香茫  
遼陽刀劍如林密征馬南催鬢似霜何知君病抱沈疴  
與君報國酬英主日為三苗亂我黎君家嘔血歸幽旅

不見夫君舊日容  
惟思攜手君所言  
君家何處侶煙霞  
白雲來處空舒卷  
獨伴遺兒還故鄉  
修途萬里多炎涼  
昔去雲擁駟馬車  
今日孤舟住夕陽  
子母寥寥淚暗流  
幾番欲葬江魚腹  
憶昔白頭人去時  
依稀點首將子囑  
教子朝夕名未成  
春光不駐東流急  
小菴日日拜空王  
百鳥啼聲驚夢長  
覺來猶是淚千行  
思君不見空斷腸  
君家功若小邱山  
誰與夫君奏廟廊  
平生功績皆湮沒  
儂身何自見君王  
恨殺烏紗能誤人  
始知名利如羅網

春去秋來愁又結  
坐看衰草心憔悴  
杜宇啼我心中悲  
我啼杜宇枝頭血  
慈靜自述

玉臺翰墨餘芳

珊瑚網

洞天去人九萬里  
涼風吹雲天似水  
珠扉高啓赤霓翔  
冰簾漾中素練舉  
碧花瑤草簇闌干  
張君危坐聽啼鸞  
翠蜃吹涎作樓閣  
青田小龍耕曉煙  
璇宮桂花秋露滑  
吳剛玉斧香凝屑  
絳節高飄阿母來  
藕黃衫子翠羅鞋  
晏香鳴箏婉華舞  
笙歌沸空擁吹臺  
自向東王一卮壽

啾啾白麟天半走，貝闕人歸龍夜吼。  
右天上謠東海

徐媛小淑氏

鳴蟬寂無聲，閒夜涼飈發。  
薜荔覆檐楹，葉際見孤月。  
流光入房櫳，徘徊照華髮。  
撫景一長嗟，終古誰不沒。  
棄世學神仙，徒勞鍊金骨。  
寒山趙氏陸

華袞輕於一字褒，儂家姊妹出蓬蒿。  
媿無芳躅追彤史，浪得虛名動彩毫。  
廣陵雲濤煙鬟氏

花牋處處有儂名，欲動春風欲轉鶯。  
對月瞻雲吟秀句，

幽閨一倍使人清  
適楚玉液纖黛氏

綺牕得聽梅花弄  
至今暗香猶襲人也  
小女胸妹告借  
秋鴻新譜特遣婢子  
顧影叩領贈戴氏二  
姬一絕附正  
雲鬟月面兩相宜  
濤作秋波液是脂  
我見猶憐而況若  
江妃漢女莫猜疑  
外曲中衛宛若楊  
三秀作容錄呈  
一品題之眉社女  
弟張徽卿

明賢詩翰合卷

凝霞閣鑒藏明名公詩翰

野寺垂楊裏春畦亂水間  
美花多暎竹好鳥不歸山  
城郭終何事風塵益駐顏  
誰能共公子薄暮欲俱還  
高陽許初元復

青天嵯峨擁高峯江光倒映十芙蓉  
長松宵窈畫無日飛泉迸出深林中  
綠樹倚石標仙客吞吐江山與邱壑  
沈先生丹青手寫出意態殊縱橫  
千年不改秋山色萬古翰苑流芳名  
淋漓翠黛展此幅身在匡廬與天目  
濟南李攀龍

謝却塵凡水上居推筵偏愛八窓虛櫓聲長雜書聲度  
波影遙連雲影疎客至烹茶沽市酒興來垂釣羨江魚  
多君佳趣雖云異終向林泉樂有餘 劉謙

池館清虛落照紅麻衣涼拂蓼花風驚鷗歷亂平沙外  
老樹含牙曲水通過雨山光清似洗涵秋江色碧如空  
唱桃山女隔山採纖步行雲入紫峯 瓊

維揚津藪漫江東渺渺三洲煙霧中雲黑蛟龍噴凌薄  
天青日月度虛空山藏林屋陰符祕水接咸池灝氣通



綵鷁朱旗留勝賞千秋文藻仰名公

東南襟帶灌羣川汗漫遙將銀漢連  
吞吐雲霞朝浴日動搖星斗夜涵天  
潛蛟亂捲千重雪孤鶴斜衝萬頃煙  
桂樹參差瑤草綠浮游真欲接飛仙

右太湖二首王

守

春湖萬頃玉溶溶橋上春山翠掃空  
神女月明珠返浦仙人雲曉笛迎風  
花枝香覆琳宮外草色青迷紫洞中  
思挂一颿凌絕頂看圖翻愧賦難工

踏破萬山雲言採千歲藥歸來春暮時杏花幾開落  
木落遠山出天空雲似低朝來賦秋興結社過橋西  
野鳥穿窻過流雲拂座來有時復對月懷抱得無開

陳鑾書

江頭春色曉重重萬樹桃花帶雨濃隨意尋芳出門去  
隔溪人語水聲中獨坐溪亭酒半酣閒看春色在江  
南沙燕舞風斜日裏晴煙漠漠柳參參近作二首上  
禹門仲山王問

幽人每愛南村樹背郭誅茆結小堂靖節歸來存菊徑  
少陵老去卜林塘茶煙冉冉晴當戶蘿月紛紛夜到床  
何日杖藜尋酒伴悠然觴咏賦羲皇 豫章胡儼

長溪東注碧流清觀水能令道眼明暖浸柳花渾濯錦  
淨涵星斗若園枰放歌自得林泉趣拂釣相忘物外情  
泉石徜徉無俗慮年來惟卧白鷗盟 我齋沈璐

地屬無桑流水濱青山白屋一間人簾鉤皓魄先迎月  
宅近陽和早領春不到西陵無別業自知仁厚有比鄰

清秋相約荷衣去放棹滄洲探白蘋  
震川歸有光

遠跡城市間築室傍林谷西邱俯簷楹流水通淇澳煙  
霞曳岩穴晨光謝晴旭軒敞見平疇身閑理耕牧魚鳥  
日相親聲利不同躅時瞻天際雲或逐溪上月車轍往  
來稀禽言相和續花開繞林春草長緣溪綠世事竟無  
聞所居樂幽獨  
海濱浦南金

溪上風輕雲淡溪頭柳媚花明借問誰家茅屋長聞鶴  
唳琴聲  
雪霽瑤林矗矗沙寒白鳥雙雙臘盡酒香麴

甕月高梅影陂塘 觀察張志撰

明光九級盡琉璃為答玄功詎惜貲地異赤烏寂教後  
基同白馬碣名時驚峯直與諸天接鳳闕翻從下界窺  
登罷欲書多寶事奈無江總善題碑 右報恩寺浮圖

皇甫百泉

把酒登樓明月夜交遊不似去年親踈花欲折偏憂雨  
北雁初來又送人稼穡有秋煙火少兵車無戰羽書頻  
却憐醉裏丹楓葉似與吟翁著意春 謝時臣

日日尋源繞白雲也憐童子每辛勤秦郎好事能成約  
陸羽無嫌許見分汲取豈辭風雨阻往來寧避虎狼羣  
幾回小集秋林下石鼎茶香滌酒醺 謨次作

畫槩雙扶一葉舸常時載酒泛滄波清風明月情無限  
水色山光興最多楊柳岸邊和雪釣蘼葭影裏扣舷歌  
塵塗擾擾勞形後為樂如君有幾何 友雲

舞罷尋芳去花枝借粉香淺紅添醉色稚綠助新妝撲  
蝶關春恨聽鶯去晝長武陵仙路杳何處問劉郎 右

賦得花間美人周繩祖

湖水滿秋碧重橋寶帶分人歸青草渡帆落洞庭雲山  
倒西南影鯨吞日月文尊前莫辭醉選勝重殷勤 右  
寶帶橋作書於蓮石齋商谷居節

江碧雲輕楚甸秋美人天遠思悠悠可憐空谷孤芳冷  
綠佩清香無那愁 顧問

六十年来鬢未絲優游林壑澹無為青山滿戶樽盈酒  
此是君家得意時 錢穀

天寒雲凍地欲裂飄風襲人草木折深崖墮氷翻白雪  
長谿滾滾水如立溪邊古樹煙火斷茅簷重閉無人迹  
中有老僧太奇絕獨舸悠悠自鳴杓笠頭垂垂散珠粒  
衲衣片片沾瑤屑短蓋那能障回飈手脚半皴脣齒齧  
罟舟漁子盡入湫笑殺老僧太癡劣冒險無求自得意  
舉世寧能論巧拙子卿氊食非人願蔡州半夜真人傑  
按圖令子三嘆息灞橋之思今已滅 嘉靖癸巳夏至  
後少華山人復初書於紫芝閣



柴門寂寂掩青蕪空谷音徽聽欲無一水故人通尺鯉  
九霄仙令擁雙鳬河南宅闕登龍句郢里人歸和雪孤  
早晚課書傳畫省於今淑問滿新都 答丁明府王世  
貞

玉漏初殘曙欲生千官端笏候華清煙消碧瓦參差見  
月晃金門上下明仙仗乍移雙扇合侍臣徐退萬花迎  
孤忠自許酬真主況復簪纓際太平 春日早朝之作  
豐南禺

嵩嶽盤雲陟處危羣峯那敢向爭奇周圭日倒千尋影  
漢栢霜封萬歲枝野色中原龍戰地鄉心南國雁來時  
西行不散登臨慨一與緱山子晉期 中嶽一首從中  
嶽之麓西去為緱山故及之莫如忠

雞鳴何如矯矯拂羽東烏未光落月承宇志士反側聞  
之起舞此生何為蓬累蹢躅振吾衣裳坐以待旦壬午  
春二月廿一日書於白龍潭舫 莫是龍

秋日幽尋物外期行行出郭得招提官閒自覺紅塵遠

地勝何妨白日遲雲散空花堪結社涼生別院試圍棋  
皇都車馬紛馳逐只隔城闌已不知 文彭

朝元山高高入雲青原玉笥連氛氲石蓮古銅鬱交翠  
蒼苔銀榜龜龍文從來人傑由地靈天降羅公應歲星  
胸藏萬卷吐奇絕第一臚傳趨帝庭帝庭宛轉石渠側  
修眉玉頰桃花色雲光錯落錦袍新珊瑚出海秋月白  
丈夫得意須少年少年通預金閨籍忽然興動碧山棲  
飄然長往焚銀魚銀魚焚却歸蓮洞一編閒誦長生書

白飯黃精鍊道真  
洞門時挂蓮華巾  
齋房乞鉢飲玉液  
別有玄境無纖塵  
肇也窮途流浪客  
落魄無聞頭已白  
卅年誤落塵網中  
時一思公情悵悵  
當時遇公茂苑邊  
曾惠瑤華燦蓬華  
一別迢迢入夢頻  
何時去會盧江濱  
盧江水遠蓬壺隔  
商山何追尋遺民  
相逢古洞受寶訣  
桃開洞口三千春  
嘉靖乙未暮春寄羅念菴蓮洞歌

開雲文肇社

刺骨清寒病不禁  
空中牢落強登臨  
塵栖每下窮途淚

幽暗難忘入社心  
竹院靜搖斜日影  
松檀徐拂梵天音  
朔風吹酒歸舟急  
鼙鼓嚴城憖沍陰  
亂後治平寺作

文元發

海擁峯頭路長松  
落日前笙歌隨處有  
羅綺照人妍  
池水和煙碧  
巖花著雨鮮  
生公片石在  
相與話因緣  
劍池近作岐雲魯治

龍藏炎氛隔蟬聲  
灌木通征帆  
指江上浪迹且山中  
晝永長林日涼分  
曠宇風秦淮醉花處  
還憶此游同  
虎

阜別友口占袁尊尼

垂楊夾御河廣陌冶遊多雞取當場鬪人將拾翠歌雲  
間馳畫轂花裏度鳴珂勝日不為樂其如春色何

映日窺金埒連雲峙玉樓豪華紛越綺俠少競吳鉤鳥  
嘯全成曲林香元入甌欲知麗春賞不減在瀛洲 燕  
遊二首戚元佐

湖中日氣午氛氲風外歌聲洲上聞青天不動閣沈樹  
白鳥下處溪成雲浮空草綠春無盡隔浦橋平野欲分

臨觴此日即脩禊却自亭前憶右軍  
煙雨樓登眺  
溪邊坐流水水流心自閒不知山月上松影落衣間  
萬竹覆北窻長日睡初覺門前一片石新漲已堪濯  
中岳元佐書

寒風吹暮雨蕭颼入簷除燈前花並落窻外葉同疎雁  
濕應難度蝸旋疑自書悠悠相憑几雲抱石堂虛  
賦  
得虛窻夜雨項元淇

永日薰風夏序催西山遙望鬱崔嵬空中飛絮撩人去

岩畔餘花待賞開  
寶樹芳林堪息影  
清泉碧澗可浮杯  
與君莫負山靈約  
早晚移文獻詔來  
初夏約遊西山  
得杯字同禹門兄作元洪

蕭疎短髮不勝冠  
卧起空齋過午餐  
幾種鳥聲新雨霽  
一番花信朔風寒  
桔槔學圃於陵子  
木榻忘年管幼安  
懶慢不須酬客難  
酒杯聊欲重交歡  
喜所知過南園  
之作少岳山人書

緇衣道者水雲家  
白袷先生醉帽斜  
幽興不窮清晝永



風前筆硯竹邊茶墨林項元汴

猗猗谷中香寫作琴上曲萬古聖人心幽花數枝玉

雪居為蘭如美人作

翡翠成雙戲晚汀楚天煙淡屬春晴騷人底事多題咏

香蕊芳椒共此情心原野夫為蘭如姝

克弘之印

湖上堂開霽色分湖空風澹水如紋家家燕乳楊花落

處處蠶眠柘葉紛脩竹欲滋三徑雨養魚常護一溪雲

不辭好事頻相過時向槎頭釣夕醺南溪別墅漫興

張服采

秀色凌雲益有神年來養就赤龍鱗和雲寫入高堂上  
相伴人間住世人古松咏陳片

已入雲林調知無軒冕緣栖枝同息鷄抱葉類鳴蟬永  
日壺尊盡涼風枕簟偏石闌閒種藥不是慕長年長  
夏園居張鳳翼

旅食遊南國王程計北燕開襟期此日分手愴何年郎  
署秋增色儒衣夜泊船逢迎雖不減同調自相憐寄

朱比部張獻翼

天上佳期近林間暑氣收遙憐河北渡正及火西流日  
暮雲連夕星闌月在樓七襄纔入咏還擬賦悲秋 七  
夕立秋張燕翼

雨收江水綠送別孝廉船陵到蝦蟆外磯來燕子前當  
爐女二八射策士三千贈子魚腸鏑成名在少年 送  
友金陸應試王穉登

欲識林中士言過山外樓諸天容客到尊酒為僧留心

鏡巖巖曉松濤樹樹秋從來空寂地不用姓名投 三

堂杜大中書

堂構千峯裏雲常戴雨回新篁青欲滴古木翠成堆難  
試謝公屐且傾陶令盃將窮奇絕處端不厭重來 杜

大綬

石上松千尺橋西水一灣杖藜從此去隨意看青山

吳門張元舉

閒支角枕暗銷魂藥碗薰爐晝掩門忽憶天涯芳草路

教人低首怨王孫  
豈覺香清酒半醒  
回頭一盼最關情  
誰能繫取西窗月  
不遣鄰雞報五更  
項道民

窮髮垂巖度懸絲  
石蔓捫無風雲自幻  
不雨晝常昏  
石似三生解人於百戰  
存飄飄任沙漠何處出乾坤  
登雲岫談壬戌事有感許光祚

霜月居然勝開軒  
面曲池團團青桂樹  
厯厯白榆枝  
好我如加膝何人不解頤  
坐來寒漏徹猶道酒行遲  
似

愛荆詞丈李維禎

昏黑尋山寺惟聽隔水鍾  
參差流荇藻窅窕削芙蓉  
十載彌天遠三春片席從  
祇應同笑語何事隱寒松  
訪友之作長干杜義欽

蔚然蒼翠中宛爾真人氣  
石上一跣跌門前雙虎踞  
予赴中侍齋師受人天供  
試問飽食時滋味還殊衆  
右祖堂作雪浪洪恩

轉覺道路難豈料故人惜  
假我好樓居愛此春湖色  
湖上梅花出短牆一開半  
落湖水香春陽羞澀杏花  
細桃

花梨花亦不忙君家有酒藏床頭可憐花月未肯游願  
君醉我君亦醉花朝慎勿嗔莫愁房櫳窈窕嬌欲留懊  
恨歸來纖月流不知此景誰能酬空將好句為君投

題項子京樓金華吳孺子

瓢杖淨如拭白頭何處來乾坤無汝並狂狷有人猜詩  
句經年鍛衣冠擬古裁每聞秋雨後蕭寺看莓苔 贈

吳玄鐵陳繼儒

真心無散亂他事不須斷過去已過了未來何用算玄

宰書於墨禪齋

鷗友鱸鄉雨不猜  
蕪葭千里散秋懷  
應憐六代風流地  
重有青蓮賦鳳臺  
右金陵作

池邊荷葉衣無盡  
臺畔松花拾有餘  
剛被世人知姓氏  
又移茅屋入深居  
為愛荆先生書董其昌

明人碧筠精舍卷

內詩翰

水滿清池竹滿樓  
長疑六月是深秋  
山僧愛客頻頻到  
受盡熏鑪與茗甌  
六月望日過寒翠軒避暑 應禎



步來禪榻畔涼氣逼團蒲花雨檐前亂茶煙竹下孤乘  
閒移畫卷習靜對香爐到此忽終日浮生一事無

老禪趺坐處疎竹翠泠泠秀色分鄰舍清陰覆佛經蕭  
蕭日暮雨曳履繞方庭雨中同李范菴過天王寺看  
竹二首 吳寬

檻外山光落經卷土岡高竹晚增幽煮茶燒笋能延客  
欲去因君復少留宿天王禪院贈南洲講主 南濠  
居士

踈簞今歲似添稠不語簾前翠欲流莫怪秋來涼思早  
暑中相過也如秋 辛巳八月朔過碧筠精舍偶題次  
韻 盧雍

高幘短袍雲霞光扁舟繫纜野籬傍焚香潔坐了無語  
山寺閉門春竹長 坐碧筠精舍 太白山人孫一元  
遠公能愛客高會免園才畫室香貂滿天華寶樹開林  
端迷塹谷象外徹樓臺對此復能醉長歌甘草萊 陪  
林屋師雪宴碧筠精舍雅宜山人王寵

日出池光欲上樓  
雨餘脩竹似鳴秋  
湘簾捲處龍團熟  
坐吸清風翠滿甌  
右和范菴先生韻

陰敷鴨脚樹  
翠翦虎鬚蒲  
境寂心同遠  
僧閒興不孤  
覆碁松下石  
潑茗竹間壚  
欲舉無生話  
相忘話亦無

雨苔春寂寂  
風鐸晝泠泠  
有客來看竹  
山僧自課經  
殘客亦去林  
鳥下空庭  
右和匏菴先生韻

愛此森森竹  
萬頭涼陰覆  
榻草堂幽  
香銷瓦鼎春  
眠覺何處一聲黃栗留  
右和南濠少卿韻


覽勝平生雙不借穿林老去一扶留白雲每借高僧榻  
黃葉時尋野寺秋 右和盧師名韻

竹影參差漏日光市聲不到定僧傍楞嚴轉罷殘陽在  
始覺空門白晝長 右和孫太初韻

上相遊行地羣賢賦咏才殘碑侵蘚卧遺蹟自花開風  
遞清齋磬鴉鳴施食臺故宮愁入望落日滿蒿萊 右  
和王履吉韻

徵明屢遊天王寺未嘗作詩戊戌南洲師出示諸賢留

題詩卷因悉用韻和之共得七首所謂雖多亦奚以爲  
也文徵明識



六藝之一錄卷三百九十一